



## ՀԵՌՈՒՍՏԱՏԵՍՈՒԹՅԱՆ ԵՎ ՌԱԴԻՈՅԻ ՀԱՆՁՆԱԺՈՂՈՎ

### ՈՐՈՇՈՒՄ

02 ապրիլի 2021 թվականի թիվ 48-Ս

ք. Երևան

#### «ՓԻ ԲԻ ՍԻ» ՍՊ ԸՆԿԵՐՈՒԹՅԱՆ ՆԿԱՏԱՍԱԲ ՎԱՐՉԱԿԱՆ ՏՈՒՅԺ ԿԻՐԱՌԵԼՈՒ ՄԱՍԻՆ

Հեռուստատեսության և ռադիոյի հանձնաժողովն (այսուհետ՝ Հանձնաժողով) ուսումնասիրելով դիմումի հիման վրա 2021 թվականի փետրվարի 17-ին հարուցված թիվ 4 վարչական վարույթի նյութերը՝ *պարզեց*.

Հանձնաժողով մուտքագրված «ՍՈՒԻԴ ՓԱՐԹՆԵՐ» ՍՊ ընկերության (այսուհետ՝ Ընկերություն) դիմում-գանգատում նշված է «ՓԻ ԲԻ ՍԻ» ՍՊ ընկերության (այսուհետ՝ Հեռարձակող) կողմից ոչ սեփական տեսալսողական հաղորդումներն առանց դրանց հեռարձակման իրավունքը հավաստող փաստաթղթերի հեռարձակելու փաստի վերաբերյալ:

Ըստ Ընկերության՝ Հեռարձակողի կողմից առանց հեռարձակման իրավունքը հավաստող փաստաթղթերի 2020 թվականի դեկտեմբերի 11-ին և 2021 թվականի հունվարի 29-ին «Ֆիլմզոն» տեսալսողական ծրագրով հեռարձակվել է «ENSEMBLE, C' EST TOUT» («ПРОСТО ВМЕСТЕ» 1X93, Ֆրանսիա 2007թ.) ֆիլմը (այսուհետ՝ Ֆիլմ), որի Հայաստանի Հանրապետությունում տարածելու բացառիկ իրավունքը պատկանում է «ՍՈՒԻԴ ՓԱՐԹՆԵՐ» ՍՊ ընկերությանը: Ընկերությունը հայտնել է նաև, որ պայմանագրային պարտավորություն է կրում իրավատիրոջ հանդեպ՝ իր իրավունքները երրորդ անձանց խախտումներից պաշտպանելու ուղղությամբ:

Դիմումում նշված է նաև, որ Ընկերության և Հեռարձակողի միջև ոչ սեփական տեսալսողական հաղորդումների հեռարձակման իրավունքի տրամադրման լիցենզիոն պայմանագիր կնքված չէ, որը թույլ կտար Հեռարձակողին Հայաստանի Հանրապետության տարածքում հեռարձակել Ֆիլմը և խնդրում է իրավախախտման հանգամանքը պարզելու դեպքում Հեռարձակողին ենթարկել համապատասխան պատասխանատվության:

Ընկերությունը 2021 թվականի փետրվարի 17-ին Հանձնաժողով է ներկայացրել 2019 թվականի նոյեմբերի 27-ին «TREBLO MEDIA LTD» ընկերության հետ կնքված բացառիկ լիցենզիայի պայմանագիրը, համաձայն որի Հայաստանի Հանրապետության տարածքում Ֆիլմը տարածելու բացառիկ օգտագործման իրավունքը պատկանում է իրեն:

Հանձնաժողովը ղեկավարվելով «Վարչարարության հիմունքների և վարչական վարույթի մասին» օրենքի 30-րդ հոդվածի 1-ին մասի ա) կետով և հիմք ընդունելով Ընկերության դիմումը՝ 2021 թվականի փետրվարի 17-ին Հեռարձակողի նկատմամբ հարուցել է վարչական վարույթ:

Հանձնաժողովը հարուցված վարչական վարույթի մասին 2021 թվականի փետրվարի 19-ին ծանուցել է Հեռարձակողին և հայտնել, որ այս հարցի վերաբերյալ կարող են ներկայացնել իրենց պարզաբանումները, բացատրությունները, ինչպես նաև 2021 թվականի հունվարի 29-ի եթերի ձայնագրությունները:

Հարուցված վարչական վարույթի ընթացքում Հեռարձակողը 2021 թվականի թվականի մարտի 03-ին Հանձնաժողովը հասցեագրված գրությամբ հայտնել է, որ իրեն պատկանող «Ֆիլմգոն» տեսալսողական ծրագրով 2020 թվականի դեկտեմբերի 11-ին և 2021 թվականի հունվարի 29-ին չի հեռարձակվել Ֆիլմը, սակայն 2021 թվականի հունվարի 29-ի եթերի ձայնագրությունները չի ներկայացրել:

Հանձնաժողովը 2021 թվականի մարտի 04-ին Ընկերությանը տեղեկացրել է Հեռարձակողի կողմից ներկայացրած պարզաբանումների մասին և առաջարկել սեղմ ժամկետում Հանձնաժողովը ներկայացնել Ընկերության մոտ առկա այլ ապացույցներ՝ վարչական վարույթի բազմակողմանի, լրիվ և օբյեկտիվ քննությունն ապահովելու համար:

2021 թվականի մարտի 19-ին Ընկերությունը Հանձնաժողով է ներկայացրել Ֆիլմի 20 վարկյան տևողությամբ տեսաձայնագրությունը: Հանձնաժողովն ուսումնասիրել է Ֆիլմի տեսաձայնագրությունը և պարզել, չնայած այն հանգամանքին որ այդ ձայնագրությունից պարզ չէ, թե որ օրվա հեռարձակում է, սակայն պարզ երևում է Ֆիլմի ընթացքում Հեռարձակողի խորհրդանիշը:

#### ***Հանձնաժողովի հիմնավորումները (պատճառաբանությունը) և եզրահանգումը.***

Հանձնաժողովի կողմից ուսումնասիրվել է վարչական վարույթի մասնակիցների կողմից ներկայացրած փաստերը, որոնք համադրվել են Ընկերության կողմից Հանձնաժողովը ներկայացված ապացույցների հետ, որի արդյունքում հայտնի է դարձել, որ Հեռարձակողը ոչ սեփական տեսալսողական հաղորդումը հեռարձակել է առանց դրա հեռարձակման իրավունքը հավաստող փաստաթղթերի առկայության, խախտելով «Տեսալսողական մեդիայի մասին» օրենքի 10-րդ հոդվածի 3-րդ մասի պահանջը:

Այսպիսով, վարչական վարույթի նյութերի ուսումնասիրության արդյունքում ամրագրում ենք, որ համաձայն «Տեսալսողական մեդիայի մասին» օրենքի՝ ոչ սեփական տեսալսողական հաղորդումները կարող են հեռարձակվել միայն դրանց հեռարձակման իրավունքը հավաստող փաստաթղթերի առկայության դեպքում, սակայն Հեռարձակողի կողմից ոչ սեփական տեսալսողական հաղորդումն առանց դրա հեռարձակման իրավունքը հավաստող փաստաթղթերի հեռարձակելու փաստ է արձանագրվել:

«Տեսալսողական մեդիայի մասին» օրենքի 10-րդ հոդվածի 3-րդ մասը սահմանում է.

«Ոչ սեփական տեսալսողական հաղորդումները կարող են հեռարձակվել միայն դրանց հեռարձակման իրավունքը հավաստող փաստաթղթերի առկայության դեպքում»:

«Տեսալսողական մեդիայի մասին» օրենքի 55-րդ հոդվածի 1-ին մասի համաձայն՝ Կարգավորող պետական մարմնի կողմից տեսալսողական մեդիայի բնագավառը կարգավորող օրենսդրության պահանջների խախտման դեպքեր հայտնաբերվելու, ինչպես նաև պետական այլ մարմինների կողմից իրենց իրավասությունների շրջանակում տեսալսողական մեդիայի բնագավառը կարգավորող օրենսդրության պահանջների խախտման դեպքեր հայտնաբերվելու և դրանց մասին կարգավորող պետական մարմին գրավոր տեղեկացվելու դեպքում կարգավորող պետական մարմինը կիրառում է հետևյալ վարչական տույժերը.

- 1) գրավոր նախազգուշացում.
- 2) տուգանք.
- 3) հեղինակագործման կամ լիցենզիայի գործողության կասեցում.
- 4) հեղինակագործման կամ լիցենզիայի գործողության դադարեցում:

«Տեսալսողական մեդիայի մասին» օրենքի 56-րդ հոդվածը սահմանում է.

«Սույն օրենքի 55-րդ հոդվածի 1-ին մասով սահմանված կարգով հայտնաբերված խախտումների առկայության դեպքում, եթե այլ բան նախատեսված չէ սույն օրենքով, ապա կարգավորող պետական մարմինն իրավախախտումը հայտնաբերելու օրվանից և (կամ) պետական այլ մարմինների կողմից իրենց իրավասությունների շրջանակում հայտնաբերված իրավախախտումների դեպքերի մասին տեղեկացվելու օրվանից ոչ ուշ, քան երկու ամսվա ընթացքում գրավոր նախազգուշացնում է խախտում կատարած անձին՝ պահանջելով վերացնել խախտումը և սահմանելով խախտումը վերացնելու համար ողջամիտ ժամկետ»:

Ելնելով վերոգրյալից և հիմք ընդունելով «Տեսալսողական մեդիայի մասին» ՀՀ օրենքի 10-րդ հոդվածի 3-րդ մասի, 55-րդ հոդվածի 1-ին մասի 1-ին կետի, 56-րդ հոդվածի դրույթները՝ Հեռուստատեսության և ռադիոյի հանձնաժողովը **որոշեց**.

1. «ՓԻ ԲԻ ՄԻ» ՍՊ ընկերության նկատմամբ կիրառել վարչական տույժ՝ գրավոր նախազգուշացում :
2. Սույն որոշումն ուժի մեջ է մտնում այն վարչական վարույթի մասնակիցներին պատշաճ ձևով հանձնելու օրվան հաջորդող օրվանից:
3. Սույն որոշումը կարող է բողոքարկվել ՀՀ վարչական դատարան՝ ուժի մեջ մտնելու օրվանից երկամսյա ժամկետում:

**ՀԵՌՈՒՍՏԱՏԵՍՈՒԹՅԱՆ ԵՎ ՌԱԴԻՈՅԻ  
ՀԱՆՁՆԱԺՈՂՈՎԻ ՆԱԽԱԳԱՀԻ ՊԱՇՏՈՆԱԿԱՏԱՐ**

**Վ. ՕՉԱՆՅԱՆ**

02 ապրիլի 2021թ.

ք. Երևան